



CENTRALE BANK VAN ARUBA

COMUNICADO DI PRENSA

Encuesta di Corupcion 2022

Oranjestad, 13 juni 2022 – Banco Central di Aruba (BCA) ta conduciendo e “Encuesta di Corupcion” cu a cuminsa dia 10 di juni 2022. E encuesta digital aki ta inclui, entre otro, preguntanan rela ta e nivel di corrupcion, e experiencia cu corrupcion na momento di haci uzo di servicionan particularmente den e sector publico y e necesidad pa medidanan adicional pa combati corrupcion.

Combati y frena corrupcion ta un prioridad halto pa BCA, pasobra corrupcion tin consecuencianan negativo economico y social. Varios organisacion internacional, manera Transparency International, ta ehecuta encuestanan riba e nivel di corrupcion na diferente pais. Como cu Aruba no ta forma parti di e encuestanan internacional aki y cu pa e motibo ey data importante di corrupcion na Aruba no ta disponibel, BCA ta tene e encuesta di corrupcion desde 2018.

Nos ta consciente cu e informacion aki ta sensitivo y pa e motibo aki ta enfatisa cu e encuesta ta totalmente anonimo y ta garantisa cu lo trata tur informacion obteni confidencialmente y uza nan solamente riba un base agrega pa metanan estadistico y analitico. Nos ta invita tur residente di Aruba riba 18 aña di edad pa participa na e encuesta importante aki door di yena e cuestionario online. Esaki ta accesibel riba nos website www.cbaruba.org.

Tocante Banco Central di Aruba

E proposito principal di Banco Central di Aruba (BCA) ta pa contribui na estabilidad financiero y prosperidad economico di comunidad di Aruba. BCA ta logra e mision aki door di implementa un maneho monetario efectivo dirigi na mantene estabilidad di balor di e florin, promove e solides y integridad di e sistema financiero, y yuda mantene un sistema di pago eficiente y confiabel.

Banda di su tareanan nucleo, BCA ta encarga cu emision di biyete di florin y moneda di florin, y ta e bankero di gobierno. Ademas e ta regula e transaccionnan di pago cu exterior y ta administra e divisanan di Aruba y ta controla e uzo di esaki.